

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, de 25. August 2022

Här President,

esou wéi d'Chambersreglement et virgesäit, biede mir lech, dës parlamentaresch Fro un den Här
Ekonomieminister an den Här Energieminister weiderzeleeden.

Am Artikel *"Wir kommentieren keine Gerüchte"*, deen de 24. August am Tageblatt publizéiert
gouf, heescht et, datt déi amerikanesch Internetfirma "Google" wéinst den héijen
Energiepräisser bei der Realisatioun vun hirem Projet vun engem Datenzentrum zu Biissen
weiderhin zögert, obwuel se duerch en Urteel vum Verwaltungsgeriicht vum 11. Mäerz dës Joer
iwwert déi néideg Rechtssécherheet verfüügt. Weider heescht et, datt déi néideg Etuden zum
Ëmweltimpakt souwéi dem Energie- a Waasserverbrauch déi d'Firma selwer muss an Optrag
ginn, nach ëmmer feelen. Den Artikel zitíiert dem Här Ekonomieminister säin Haus schliisslech
mat der Ausso, datt d'Regierung op d'Zouso vun engem konkreten Delai fir d'Realisatioun vum
Projet verzicht, mee datt de Staat iwwert säi Virkafsrecht d'Méiglechkeet hätt, den
entsprechenden Terrain vun 33 Hektar gegebenenfalls zum urspréngleche Kafpräis
zeréckzekeréien a fir aner ekonomesch Aktivitéiten ze notzen.

An deem Zesummenhang géife mir der Regierung gär dës Froe stellen:


- 1) Wéi steet d'Regierung zu den allgemengen Aussoen an dësem Artikel?
- 2) D'Energieversuergung vun eise Betriber wäert net nëmmen am Fall Google an den
nächste Méint kontrovers diskutéiert ginn. Wéi d'Regierung schonn an der Äntwert
op déi parlamentaresch Fro Nummer 6042 geschriwwen huet, ass net
auszuschléissen, datt am Wanter opgrond vun engem Gasmangel déi grouss
Betriber mussen zougemaach ginn. Kann d'Regierung matdeelen, wéi déi
duerchschnëttlech Stroum- an Energiepräisser fir d'Betriber sech säit dem 1. Januar
2021 entwéckelt hunn a preziséieren, wéi eng Gespréicher bis ewell souwuel mat
Google wéi allgemeng mat Betriber déi bis ewell d' Intentioun geäussert haten sech
zu Lëtzebuerg néierzeloossen, iwwert de Risiko vun engem zäitweiligen
Zwangsstellstand gefouert goufen?
- 3) Wéi steet d'Regierung zu der Ausso am genannten Artikel, datt d'Firma Google sech
offenbar nach ëmmer net ëm déi néideg Ëmweltimpakt- a Waasserverbrauchsetude
beméit huet?

- 4) Kann d'Regierung matdeelen, wéi eng direkt Käschten dem Staat an domat de Lëtzebuerger Bierger duerch déi laang Verzögerung an déi feelend konkret Zousoen zu engem Delai entstinn? Kann d'Regierung an deem Sënn preziséieren, ob eng separat Rechnung zu den Opportunitéitskäschten erstellt ginn ass, déi doduerch entstinn, datt den Terrain während deem entsprechenden Zäitraum ekonomesch net anerwäiteg ka genotzt ginn a wéi héich dës sinn? Falls net, firwat net?

Mat déiwem Respekt,



Fernand Kartheiser
Deputéierten



Roy Reding
Deputéierten



Réponse commune de Monsieur le Ministre de l'Économie, Franz Fayot, de Monsieur le Premier ministre, ministre d'État, Xavier Bettel, de Monsieur le Ministre de l'Énergie, Claude Turmes, et de Madame la Ministre de l'Environnement, du Climat et du Développement durable, à la question parlementaire n°6713 du 25 août 2022 de Messieurs les Députés Fernand Kartheiser et Roy Reding au sujet d'un centre de données de Bissen

Zur Fro 1:

D'Aussoe vum Wirtschaftsministère an deem vum honorabelen Deputéierte genannte Presseartikel ginn dat erëm, wat de Wirtschaftsminister Franz Fayot schonns de 4. Mee 2022 an der Chamber am Kader vun enger erweiterter Fro vum Deputéierte Laurent Mosar iwwer den Dossier Google gesot huet an och op d'parlamentaresch Fro 6692 geäntwert huet.

Zur Fro 2:

No Informatiounen vun Enovos hunn sech déi integréiert Stroum- a Gaspräisser fir d'Betriber vum 1. Semester 2022 par Rapport zum 1. Semester 2021 wéi hei an den Tableauen ze gesinn entwéckelt. Dës Entwécklung baséiert op den Zuelen, déi Enovos fir all Semester dem Statec weiderleet.

Stroum

| Consommation d'électricité annuelle [MWh] | | Augmentation prix intégré TTC Sem 1 2022 vs Sem 1 2021 |
|---|------------|--|
| Minimum | Maximum | [%] |
| | < 20 | 14% |
| 20 | < 500 | 38% |
| 500 | < 2 000 | 35% |
| 2.000 | < 20 000 | 76% |
| 20.000 | < 70 000 | 67% |
| 70.000 | < =150 000 | 50% |
| >= 150 000 | | 183% |

Gas

| Consommation de gaz naturel annuelle [GJ] | | Augmentation prix intégré TTC Sem1 2022 vs Sem 1 2021 |
|--|-------------|---|
| Minimum | Maximum | [%] |
| | < 1 000 | 112% |
| 1.000 | < 10 000 | 125% |
| 10.000 | < 100 000 | 167% |
| 100.000 | < 1 000 000 | 223% |
| 1.000.000 | < 4 000 000 | 348% |

Zur Fro 3:

De Projet vu Google ënnerläit dem modifizéierte Gesetz vum 15.5.2018 iwwert d'Ëmweltpakter vu verschiddene Projeten (« loi modifiée du 15 mai 2018 relative à l'évaluation des incidences sur l'environnement »). An dësem Kontext gouf de 6. Januar 2021, nom Artikel 5 vum EIE-Gesetz, en Avis („Scoping“-Avis) ausgestellt iwwert den Inhalt vum Ëmweltrapport („rapport d'évaluation“ nom Artikel 6 vum EIE-Gesetz). Et ass um Maître d'ouvrage dëse Rapport vun engem agreéierte Büro erstellen ze loossen. De Ministère fir Ëmwelt, Klima an nohalteg Entwécklung, als zoustänneg Autoritéit fir d'EIE-Gesetz, ass bis haut nach net mat dem Rapport saiséiert ginn. Et ass an dëser Phase vun der EIE-Prozedur eleng an der Hand vum Maître d'ouvrage fir ze kucke wéi séier déi noutwendeg Etüde kënnen, respektiv solle geliwwert ginn. Laut dem Artikel 20 vum modifizéierten EIE-Gesetz ass de „Scoping“-Avis 5 Joer valabel, en Delai deen ëm maximal 2 Joer ka verlängert ginn opgrond vun enger entspreichend begrënnter Demande vum Maître d'ouvrage.

Zur Fro 4:

Wéi all Projet vun enger bestëmmter Envergure, muss de Projet Google all Etappen duerchlafen am Respekt vum legale Kader an de Prozeduren déi dofir virgesi sinn. Elo, wou all déi juristesche Recours'en a Punkto Ëmännerung vum PAG vun der Gemeng Biissen epuiséiert sinn, ass et um Investisseur fir déi néideg Initiativen ze huelen a fir déi nächst Demarche respektiv Etüden ze maachen. Sollt et do zu Retarde kommen, dann entsti weder fir de Staat nach fir de Lëtzebuerger Bierger eventuell Käschten.

D'Fro zum Erstelle vun enger separater Rechnung zu den Opportunitéitskäschten déi sollen doduerch entstoen, datt den Terrain während engem bestëmmten Zäitraum ekonomesch net anerwäiteg ka genotzt ginn ass reng hypothetesch a kann dofir net beäntwert ginn.

Luxembourg, le 11/10/2022

Le ministre de l'Économie

(s.) Franz Fayot